

17

LA

1622  
(296)

# SECONDE DEFFAITE DE L'ARMEE NAVALE

4954

DES ROGHELLOIS.  
PAR MONSIEVR LE DVC DE  
GVISE.

## ENSEMBLE

*La Deputation des ennemis, en l'armee  
Royale, les submissions par eux faites,  
avec les Pauillons, Banieres & Com-  
mission rendues par lesdits Deputez en-  
tre les mains de mondit Sieur Duc  
de Guise.*

Le Mardy 15. Novembre 1612.

A PARIS,  
Par CHARLES CHAPPELLAIN, près le Pont  
S. Michel.

M. DC. XXII.

AVEC PERMISSION.

15. E. 300  
ad  
m. 2

(792) 101-83-254

SECONDE

DE

LA

NAVIGATION

PAR

LE

PAR

LE

LE

LE

LE

LE

LE

LE

LE


LE

LE

LE

LE





# LA SECONDE DEFFAITE DE L'AR- MEE NAVALE DES RO- chelois, par Monsieur le Duc de Guise.

ENSEMBLE

LA DEPUTATION DES  
Ennemis en l'Armée Royale : Les  
Submissions par eux faites, avec les  
Pauillons, Banieres, & Commission  
renduës par lesdits Deputez entre les  
mains dudit Seigneur Duc de Guise.

*Le quinZiesme iour de Novembre 1622.*

EPVIS le 27. Octobre dernier,  
que la bataille Nauale fut don-  
née ainsi que l'on a veu cy deuant  
par la premiere Relation, Mon-  
seigneur le Duc de Guise se retira à  
l'Aiguillon, rade tres-commode, & où

A ij

le fond est excellent, d'autant qu'il est va-  
seux, & que les vaisseaux n'y peuuent perir,  
combien qu'ils fussent chassés à la coste par  
les tempestes; son dessein fut de voir la con-  
tenance des ennemis, lesquels s'estans reti-  
rez sous la forteresse de saint Martin de Ré  
derriere vn banc tres-fauorable pour eux,  
rendoient quasi impossible la fin totale de  
la victoire; d'autant que ce Canalest gran-  
dement plein d'écueils, qu'il y a fort peu  
d'eau, que les marées sont fort viues, & por-  
tent bien souuent sur les dangers, & que  
leurs vaisseaux sont petits & ceux de Mon-  
seigneur le Duc de Guise puissants, grands  
& tirans beaucoup d'eau. Cette distance  
qu'il y a entre saint Martin de Ré & l'Ai-  
guillon n'est que deux lieuës; de façon que  
les armées estoient l'vne deuant l'autre le  
banc entre deux.

Monseigneur le Duc de Guise fit faire  
le signal du Conseil le 29. Octobre, & pro-  
posa d'attaquer les ennemis dans le bas  
fonds, où ils auoient pris leur poste; alle-  
guant les incommoditez que les ennemis  
auoient receuës en l'autre combat, & la  
commodité qui luy estoit arriuée de dix



vaisseaux que le Marquis de Roüillac, Marechal de bataille en l'armée, luy auoit amenez le jour de deuant, lequel estoit sorty de Brouage, où il estoit, au bruit de l'armée, pour se rendre auprès de mondit Seigneur: que de dix vaisseaux qu'il auoit, il y en auoit huit de moyens, & ne tirans pas plus d'eau que ceux des ennemis, qu'il s'en trouueroit encore nombre pareil dans ladite armée, & qu'avec dix Pataches jointes aux seize vaisseaux susdits on les pourroit enuoyer proche d'eux à la portée du pistolet, & se mesler, s'il en estoit besoin, pour prendre leur party, selon la resistance ou foiblesse des ennemis. Lesquels petits vaisseaux & pataches Monseigneur le Duc de Guise soustiendroit avec le reste de son Armée, ayant ordonné que chacun marcheroit la sonde à la main pour s'empescher d'estre eschoüé, & que tous les vaisseaux iroient tant qu'ils pourroient rencontrer d'eau.

Ceste journée mondit Seigneur ordonna du Combat en cette sorte, à sçauoir que Monsieur de saint Luc meneroit l'Avant-garde avec huit grands Nauires, que

Monseigneur de Guise meneroit la bataille, que le Cheualier de Razilly conduiroit l'Arriere-garde avec sept Nauires, & que le Marquis de Roüillac se tiendrait avec sept Nauires des meilleurs & plus grands de l'armée au vent de Monseigneur le Duc de Guise, pour faire combattre les escadres à tēps, r'amener les vaisseaux fuyards au combat, & assister les corps qui seroient trop pressez des ennemis, selon l'occurēce, que les vaisseaux ne trouuans plus d'eau pour s'approcher desdits ennemis, mouilleroient de front: Que le sieur de S. Luc prendroit la main gauche de Monseigneur, avec l'escadre, que le Cheualier de Razilly doubleroit sur la main gauche dudit sieur de S. Luc avec son escadre, & que le Marquis de Rouillac doubleroit la main droiēte de mondit seigneur avec la sienne: Et que tous ces vaisseaux estans d'un front, feroient vne tēpeste de batterie contre les ennemis, qui estoient amoncellez proches l'un de l'autre, à cause que le lieu où ils estoient, nommé la fosse de l'Oye, estoit fort estroit. Que les Pilotes de l'armée asseuroient Monseigneur, qu'ils le meneroient à la portée du mousquet



proche des ennemis, & combien qu'il y eust vn peril eminent pour la quantité des escueils, & qu'avec les hautes marées qui approchoient, ils pourroient arriuer à ceste distance, le temps estans doux & serain.

Il fut donc conclud, qu'au premier vent fauorable Monseigneur le Duc de Guize feroit tirer vn coup de Canon, & soudain apres toute l'armée se mettroit sous voiles, & commanda au Marquis de Rouillac de donner ordre de faire entēdre de point en point la resolution de mondit Seigneur touchant le combat, & que tous Capitaines eussent à l'observer entieremēt, sans s'embarasser dans la confusion & le desordre.

La nuit du 30. Octobre, la tempeste deuint si furieuse, que toute l'armée en fut grandement trauaillée, & mesmes plusieurs vaisseaux chasserent leurs Ancres iusques à la coste, lesquels neantmoins n'eurent point de mal. Ceste tempeste dura sept iours & sept nuits entieres, iusques au sixiesme iour de Novembre, que la nuit deuint calme, mais ne dura que cette seule iournée, & continua la tempeste iusques au huitiesme dudit mois, que les Galeres ne pouuans

plus résister à la mer à cause des orages fréquents , & de la nudité des esclaves qui ne pouuoient supporter la rigueur du froid , se mirent à la voile , & monstrent bien l'excellence de cette sorte de vaisseaux: car leur vifesse eust fait penser que ç'eussent plustost esté flèches que des corps propres à nauiger: Elles se retirèrent dans le Havre de Brouage, & Monsieur le Général témoignoit vn regret inconsolable de se voir forcé à quitter Monseigneur le Duc de Guise à la veille d'une si belle iournée.

Monseigneur le Comte de Soissons enuoya visiter cependant mondit Seigneur le Duc de Guise par Monsieur de Seneterre, à dessein que tous deux feissent ce qui seroit à propos pour le seruice de DIEU & du Roy : Il fut donc arresté que le lendemain le Marquis de Roüillac iroit trouuer mondit Seigneur le Comte de Soissons de la part de mondit Seigneur le Duc de Guise, pour luy proposer l'attaque de l'Isle de Ré; Ce qui fut executé le vnziemesme iour de Nouembre dernier par ledit Marquis de Roüillac , lequel vit mondit Seigneur le Comte de Soissons, après que les Deputez  
furent



furent arriués il n'y auoit pas deux heures de la part du Roy, pour faire executer les articles du Traicté de la paix, affligé au mourir de ne pouuoir rendre ce seruice au Roy, comme il estoit aisé à croire, eu esgarda la generosité & vertu qu'il a fait paroistre au commandement de l'Armée deuant la Rochelle.

Le Samedy 12. iour ensuiuant ledit Sieur Marquis retourna vers Mondit Seigneur le Duc de Guise, & trouua que l'armée Nauale des ennemis n'auoit fait nul acte de Paix, qu'ils auoient les Pauillons hauts en contenance de gens armés qui continuoient à tesmoigner leur rebellion.

La nuict du mesme iour le vent deuint fauorable pour aller attaquer les ennemis, Monsieur de Guise, suiuant son premier dessein, dez la pointe du iour fit tirer vn coup de Canon, & enuoya querir le Marquis de Rouillac, auquel il commanda de faire la charge, ledit Sieur Marquis aussi tost donna l'ordre, selon le project de mondit Sieur, au Sergent de bataille & à son ayde, & leur commanda d'aller de

Nauire en Nauire pour recommander le dit ordre aux Capitaines, , afin qu'il n'y eust point de desordre en tout le corps de l'armée, & que tous les vaisseaux eussent à marcher au signal qui auoit esté donné par le commandement de mondit Sieur le Duc de Guise.

Soudain toute l'Armée se mit sous les voiles & chacun prenant son poste ainsi qu'il auoit esté ordonné par Monsieur de Guise, ladite Armée sortit en ordre selon la resolution de Monseigneur. Elle arriva donc à la portée du faucōneau des ennemis, lesquels pour faire parade de grand nombre de vaisseaux qui peussent remplacer celuy qui s'estoit diminué par la perte du premier Combat, auoient fait joindre à eux quantité de Barques & vaisseaux Flamands : qui voyans les deux armées proches & aux coups de Canon, se retirèrent du pair & de la presse, sortirent du Combat & chasserent à la Mer : Alors tous les vaisseaux mouillèrent de fond, comme il auoit esté resolu, & commençans à battre furieusement les Rebelles & de leurs Canons, tirans incessamment sur eux,



faisoient vn grand domnage à leurs vaisseaux, qui se recognoissans foibles & en danger d'estre deffaicts, ne voulurent résister dauantage craignans y demeurer: & neantmoins quoy qu'ils fissent, leur Admiral & Vice-Admiral se voulans retirer eschoüerent, plusieurs de leurs vaisseaux furent fracassez du Canon, d'autres leurs voiles emportez, & autres coulez à fonds: De telle sorte que deuant que la nuict arriuaſt, on ne vid plus que dix-sept Nauires des leur subsistans, sept de leurs Pataches ayans esté ruynées & coulées à fonds:

Cette attaque incommoda grandement les ennemis, & fit voir la grandeur de la victoire par la diminution de leurs forces, veu que de soixante vaisseaux qu'ils auoient au premier combat il en restoit si peu.

La nuict empescha que les petits vaisseaux de Monsieur de Guise n'allassent à l'abbord, neantmoins il resolut de ne les perdre de veüe, tant qu'il resteroit vne seule marque de la Rebellion des ennemis, & que leurs Pauillons demeureroient armez.

Durant le Combat deux Conseillers Deputés par la Grand' Chambre du Parlement de Bordeaux, avec quelques autres de leur corps arriuerent pres Monseigneur de Guise, vers lequel ils estoient enuoyez, & sur l'arriuée de la nuit ils entrerent dans le bord de mondit Seigneur, & luy firent entendre le sujet de leur Deputation, qui n'estoit autre que pour luy rendre des loüanges de sa vertu, le remercier du bien que toute la Guyenne receuoit de la victoire que Dieu auoit donnée au Roy par le moyen de sa bonne & heureuse conduicte, & comme pour la rendre plus auguste, le Parlement auoit donné seance entr'eux à celuy qui leur en auoir porté la nouuelle, qu'on en auoit fait chanter le *Te Deum* dans la ville de Bordeaux où le Parlement auoit assisté en corps, que tout le peuple en auoit chanté loüanges à Dieu, & qu'au nom & de la part dudit Parlement, & de la leur particuliere, ils venoient luy rendre vne recognoissance de ce que sa vertu leur redonnoit la liberté du commerce & trafic.

En mesme temps la mauuaise issuë que



les ennemis receurent de ce Combat, fut cause qu'ils se resolurent de Deputer vers Monseigneur de Guise, se doubtans bien qu'ils ne pouroient plus subsister le lendemain, & que Mondit Seigneur s'eschoüeroit plustost parmy eux, au hazard de perdre toute son armee, que de les laisser encore subsister : & de fait fut enuoyé de leur part vers Mondit Seigneur le Sieur de S. Germain, le suppliant tres-humblement, avec des paroles de respect & conuenables à l'honneur qu'ils doiuent à sa Majesté, & à la qualité de mondit Seigneur, de leur vouloir donner la iournée du lendemain iusques à midy ; que durant le Combat il leur estoit venu quelques nouuelles de paix ; mais qu'ils n'auoient point encore receu d'ordre de la Rochelle : Dans lequel temps ils promettoient executer de poinct en poinct ce qui auoit esté ordonné par le Traicté de la Paix, & ce que mondit Seigneur leur voudroit ordonner de la part du Roy. Lequel leur fit vne responce conuenable à la dignité des armes de sa Majesté ; concluant que puis qu'ils luy demandoient cela par

grace, il leur accordoit, & qu'en cela il appliquoit la bonté du Roy à leur foiblesse. Mais que si dans ledit temps ils ne luy portoient la Banniere & la commission del'Assemblée rebelle, le lendemain il acheueroit de les deffaire.

Cette nuit donc se passa sans qu'il fust rien alteré de nouveau iusques sur les 9. heures du lendemain matin, que le Sieur Prou, le Scindic de la Rochelle avec deux autres Deputés, joinct avec eux vn Deputé de Mōtauban, vindrent trouuer Mondit Seigneur, pour faire executer sur la Mer les Articles dudit Traicté, accordez par sa Majesté ausdits rebelles de la Rochelle.

Monseigneur de Guise apres les auoir ouys leur dit, que puis que la Clemence du Roy surmontoit leur Rebellion, qu'il feroit marry d'empescher l'effect d'vne telle bonté, & que moyennant qu'ils luy apportassent le Pauillon & ladite Commission de l'Assemblée, il feroit le licentement de l'Armée, ainsi qu'il auoit esté ordonné par sa Majesté.

Lesdits Deputés s'en allerent donc vers ladite Armée ennemie, & le Mardy 15.



quinziesme Novembre dernier, ils retournerent vers mondit Sieur de Guise. lequel si tost qu'il les vit entrer en son Gallion s'assit dans vne chaire, tous les plus qualifiez Gentils-hommes de l'Armée du Roy estans à l'entour de luy, & receut en leur presence, & en presence desdits Deputez du Parlement de Bordeaux, les tres-humbles Submissions des Rochelois, lesquels, les genoux en terre demanderent pardon à celuy qui en qualité de General de la Mer representoit la persōne du Roy. Aussi pour trophée & pour marque de plaine victoire, ils jetterent à ses pieds le Pauillon, Bannieres & la Commission illicite de leur pouuoir, se recognoissans du tout vaincus & en estat d'implorer comme ils faisoient la grace du Prince.

F I N.



## PERMISSION.

**I**Lest permis à Charles Chapellain  
d'imprimer La seconde deffaiete  
de l'Armée Nauale des Rochelois  
par Moiseigneur le Duc de Guise,  
Et deffence à tous autres, &c. Faict  
ce 20. Novembre 1622.

DE BAILLEVE.





